

FEMINISMU

Una trentena de colectivos presenten nos xulgaos d'Uviéu y Xixón autoinculpaciones dientro de la campaña en defensa del derechu al albuertu

Una trentena de colectivos feministes presentaron nos xulgaos d'Uviéu y Xixón autoinculpaciones por casos d'interrupciones voluntaries del embarazu nel marcu d'una campaña reivindicativa pol derechu al albuertu.

Según fixeron saber los colectivos per una nota de prensa, les inculpaciones foron de muyeres que declararon qu'interrumpieran voluntariamente'l so embarazu y d'homos que declararon qu'acompañaran a una muyer a albortar voluntariamente. L'oxetivu d'esti actu ye denunciar "la persecución a la que se ta sometiendo a les muyeres y esiximos que'l derechu a albortar se garantice na rede sanitaria pública".

Con estos actos los colectivos asturianos améstense "a la movilización xeneral que nesta selmana se desenvuelve en tol Estáu a propuesta de les organizaciones del movimientu feminista y en solidaridá coles muyeres qu'albortaron y que tán llamando a declarar a los xulgaos".

Otramiente, con esta iniciativa xudicial tamién se quier poner de manifiestu la necesidá de "sacar l'albuertu del códigu penal y que se reconozca como un derechu".

Ente los colectivos que promueven esta campaña hai asociaciones de muyeres, organizaciones polítiques y clíniques de practiquen albuertos.